



Inatsisartut Ilaqutariinnermut Peqqissutsimullu Ataatsimiititaliaanut
Att: Tillie Martinussen

**Utoqqalinersiallit akiliunneqarlutik angalasarnissaat pillugu UPA 2015/20-mut
siunnersuummut tunngatillugu qulaajaassutaasumik apeqqutinut akissutit**

Aallarniutigalugu uannut pingaaruteqarpoq erseqqissaassutigissallugu qanigisaasoq pinartumik napparsimatillugu aamma/imaluunniit toquneranut ilisaanerannullu atatillugu angalanermut utoqqalinersiallit pillugit inatsit atuuttoq naapertorlugu aningaasatigut ikiorsiisoqarsinnaanngimmat.

Utoqqalinermermi pensionisiat pillugit peqqussutip § 15-ia periarfissiivoq inummut tapinik tunniussinissamut, tapiissutaasinnaasulli periarfissiinngillat qanigisat pinartumik napparsimanerannut aamma/imaluunniit toqunerannut ilisaanerannullu atatillugu angalanernut inummut tapinik tunniussinissamut.

1) Pinartumik napparsimasoqartillugu aamma/imaluunniit toqusoqartillugu ilisisoqartillugulu qanigisaasut angalaneranut aningaasartuutaannut akiliussinissamut pisortat ikiorsiisinaanerat pillugu Inatsisartut peqqussutaanni nr. 15, 20. november 2006-imeersumi § 20, imm. 3 naapertorlugu utoqqalinersiallannut tunngatillugu nalorninartoqarsinnaanera Ilaqutariinnermut, Naligiissitaanermut Isumaginninnermullu Naalakkersuisoq isumaqarpa?

Pisortanit ikiorsiissutit pillugit peqqussummi § 20, imm. 3 malillugu inunnut peqqussummi piumasaqaatitut aalajangersakkanik naammassinnittunut qanigisap pinartumik napparsimaneranut aamma/imaluunniit toquneranut ilisaanerannullu atatillugu angalanermut pisortat ikiorsiissuteqarsinnaapput.

Pisortanit ikiorsiissutit pillugit Inatsisartut peqqussutaanni nr. 15, 20. november 2006-imeersumi § 20, imm. 3 malillugu qanigisaasup pinartumik napparsimaneranut aamma/imaluunniit toquneranut ilisaanerannullu atatillugu utoqqalinersiallip angalaneranut pisortanit ikiorsiissutit tunniunneqarsinnaanngillat.

Tamatumunnga pissutaavoq utoqqalinersiallit § 20, imm. 3 naapertorlugu ikiorsiissutinik pissarsinissamut piumasaqaatinik naammassinninnginnerat. § 20, imm. 1-imi takuneqarsinnaavoq pisortat ikiorsiissutaannik pissarsisartup ataasiaannartumik aningaasartuutinut ikiorsiissutinik pissarsissaguni piumasaqaatit arlallit naammassissagai, taakkununnga ilanngullugu pissarsisartup §§ 8-mi, 7-imi aamma 4, imm. 1-imi piumasaqaataasut naammassissimassavai.

08. maj 2015
Sullap nr. 2015-111634
All. Nr. 1957461

Postboks 260
3900 Nuuk
Oqarasuaat (+299) 34 50 00
Fax (+299) 34 66 66
E-mail: lian@nanoq.gl
www.naalakkersuisut.gl

Utoqqalinersiallip §§ 7-imi aamma 8-mi piumasaqaatit naammassinngilai. Tamatuma saniatigut utoqqalinersiutilik utoqqalinersiutillit pillugit peqqussut naapertorlugu utoqqalinersiutinik pissarsisarpoq.

2) Utoqqalinersiallit illoqarfigisap avataanut ilisiartornissamut tamakkiisumik ilaannilluunniit akiliussinissamut pisortat akiliussinissamut piginnaatitaaffeqarnerat pillugu Inatsisartut peqqussutaat nr. 15, 20. November 2006-imeersumi § 20, imm. 3 kommunit qanoq annertutigisumik atortarneraat ilisimatitsissutigineqarsinnaava?

Qanigisap pinartumik napparsimaneranut aamma/imaluunniit toquneranut ilisaanerannullu atatillugu angalanermi aningaasartuutitut ikiorsiisoqartarneraq pillugu kommunit 2015-imi upernaakkut aperineqarput.

Kommunitit sisamaasunit pingasut akissutaat pissarsiarivagut.

Kommunit ilisimatitsippot Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersaq, kingusinnerusukkut allannguuteqartoq malillugu qanigisap pinartumik napparsimaneranut aamma/imaluunniit toquneranut ilisaanerannullu atatillugu angalanernut aningaasartuutit matussutissaannik utoqqalinersiallit 2014-imi ikiorserneqarsimangitsut.

3) Tamakkiisumik ilaannilluunniit akiliunneqarneq aamma/imaluunniit utertitsinissamik pisussaaffeqarneq qanoq annertutigisumik atornerqarpat?

Apeqqu 2-mut aamma 1-imut akissutit innersuussutigineqarput.

4) Pisortat ikiorsiissutaat pillugit malittarisassani § 20, imm. 3-mik atuinermut tunngatillugu periuserineqartartoq kommunit sisamat akornanni assigiiarpa?

Apeqqu 2-mut akissut innersuussutigineqarpoq.

5) Qanigisanik pinartumik napparsimasoqartillugu aamma/imaluunniit toqusoqartillugu ilisoqartillugulu tamakkiisumik pingaartumik utoqqalinersialinnut 2013-imi 2014-imilu angalanernut aningaasartuutitut pisortat ikiorsiinerat kommuninut qanoq akeqarsimanersaq ilisimatitsissutigineqarsinnaava?

Naalackersuisoqarfimmut ilisimatitsissutigineqarpoq pisortanit ikiorsiissutit pillugit peqqussummi § 20, imm. 3 malillugu ilisiartorluni angalanernut kommunit 2014-imi utoqqalinersiutilinnut aningaasartuuteqarsimangitsut.

6) Pisortat ikiorsiissutaat pillugit malittarisassani angalanernut aaqqissuussinerit iluarsineqarnissaat pillugu kommunit immikkut qanoq kissaateqarnerat utoqqalinersialinnullu tunngatillugu allaffissornikkut aaqqiinerit eqqarsaatigalugit qanoq inissisimanerat ilisimasaqarfigaagit?

Tamanna pillugu kommunitit nalunaaruteqartoqarsimangilaq.

7) Taakku saniatigut ajornartorsiutit imaluunniit malittarisassani § 20, imm. 3 pisortanit ikiorsiissutitut atatillugu kissaatit pillugit kommunit saqqummiussaqsimanerannik ilisimasaqarpit aamma malittarisassat nalilersorneqarsimappat?

Naalackersuisoqarfiup isumaginninnermi inatsimmut, tassunga ilanngullugu pisortanit ikiorsiissutit pillugit inatsisartut peqqussutaannut apeqqutit pillugit kommunit ingerlaavartumik attaveqarfigisarpai. Tamatuma saniatigut isumaginninnermi maleruagassanik naalackersuisoqarfik nakkutilliinermik suliaqaraangat peqqussummi aalajangersakkanik kommunit ingerlatsisarnerat pillugu ilisimasanik naalackersuisoqarfik pissarsiuarpoq.

Akilerartarnermut Atugarissaarnermullu Ataatsimiititaliarsuup isumaliutissiissutaa malillugu pisortat ikiorsiissuteqartarnerannik aqqissuussap nalilersorneqarnerattut tamanna isigineqarsinnaavoq, tassa maleruagassat taakku nalilersorneqarmata aamma siumut isigisumik sulinissamik inassuteqaateqartoqarmat.

8) Pisortat ikiorsiissutaat pillugit malittarisassanik kommunit atuinerat pillugu Naalackersuisut immikkut ilisimasaqanngippata tamatuma sumik tunngaveqarnersoq paasissutissiissutigeqquneqarpoq.

Tamanna pillugu kommunit aperivagut, taamalu nutaanik ilisimasaqalerluta pisortanit ikiorsiissutit pillugit inatsisartut peqqussutaat malillugu utoqqalinersiallit angalanerminni aningaasartuutaannut kommunit ikiorsiineq ajornerannik uppernarsaasunik.

Tamatuma saniatigut ilisimatitsissutigineqassaaq, Naatsorsueqqissaartarfik ingerlaavartumik isumaginninnermi kisitsisitigut paasissutissanik suliaqartarmat tamanullu saqqummiussarluni, aammattaaq pisortanit ikiorsiissutitut tunngassuteqartunik. Taamaalilluni pisortat ikiorsiissutaat pillugit maleruagassanik kommunit atuisarnerat pillugu kisitsisit piviusunik paasissutissaateqartoqarpoq.

Inussiarnersumik inuulluaqqusillunga


Martha Lund Olsen